

大同縣志

卷十七 人物  
卷十八 列女

大同縣志卷十七

人物

後

文苑  
寓賢

功階  
仙釋

孝友  
技術

行義

文苑

文之在天者曰日月星辰在地者曰山川草木其於人也以磊落英特之襟期而遍歷名都奧區極盡壯遊以激發其志氣則發為文章足以經世而行遠矣雲中地氣深厚淵淳懿茂之澤及人者多故窮經以致用者代不乏人繼前修勵後進所重望於今日也乎

劉勳字少宣少日即知名住太學與兄譙胥有聲場屋間專工詩學金士大夫多傳誦之兼長尺牘落筆皆可觀風流蘊藉見於

大同縣志

卷十七

人物後

一

文字者皆然

張從儉元延祐中為榆次令有異政邑中耆老立碑記之

杜唐卿德高學古元時官至浙江省參政

李溥光幼出家為僧號雪菴和尚喜讀書經傳子史無不淹貫善

詩工書筆法適勁尤長於擘窠大字一時宮殿匾額皆出其手

至元間奉詔蓄髮授昭文館大學士著雪菴集帖行世

吳明志號樂齋元時累官國子助教文學重於一世

許子遜元時授中奉大夫集賢學士有才識通今習古凡詔誥必

更其手文章振卓於時

李嚴元時初業儒博覽經史旁通書算之學為和寧路學政棄歸

口以著述爲事

吳翔明正統初任代王府教授改都御史年富薦其才知曹縣有惠政

劉文字宗華以鄉貢選習譯字登明正統元年進士授中書舍人仍譯字十四年命提督四譯館丁母憂詔奪情任事陞吏部郎中天順初以功陞右通政乞休至家卒

郭紀明正統甲子舉鄉試第一辛未成進士選監察御史累官江西布政使紀少有雋才釋褐後肆力於詩古文辭書法琴曲亦皆精妙當世稱爲三絕

撒俊明成化中由歲貢知陝西醴泉縣增築外城建立場市歷九

大同縣志

卷十七

人物後

二

載剛方如一

李敬明宏治己酉鄉舉知文登縣清操自勵政有實效遷去民思之立碑

李翰臣明正德三年進士官御史巡按山東吏部主事梁穀誣歸善王當沅謀逆翰臣劾穀挾私近倖方欲邀功以翰臣爲逆人掩飾逮繫詔獄謫德州判官終山東副使

樊深明嘉靖間爲通政使疏劾仇鸞時鸞上方優眷立斥深爲民穆宗初復官尋遷刑部右侍郎時恩赦死罪以下而流徒已至配者所司拘律令不遣深言殊死猶赦而此反不及非所以廣皇仁詔從其議旋晉左侍郎罷歸卒

任中立明嘉靖辛卯舉人初任沂水知縣時盜匪聚掠建策擒獲  
陞順天府推官轉戶部主事征倭敘功授正五品

王應元字象元幼習舉子業既而棄去臨池學書專精古人法帖  
其楷書出筆卽邁時俗出入於歐虞褚薛諸家自成一格草書  
則力追王內史奕奕有生動氣小如蠅頭大而徑丈靡不精妙  
晚年研精禪理

朱遜炘號草軒代王桂子善擘窩大書尤工寫竹時共珍之炘孫  
冽泉者逸其名亦善畫竹學夏太常景頗造其妙按明世諸王  
多以翰墨見稱而累傳忠貞代簡王之子孫尤著云

李一鶚翰臣孫明嘉靖乙卯舉人性醇篤初任無極知縣調江寧

大同縣志

卷十七

人物後

三

以治最陞南京戶部主事轉刑部郎中爲同舍所忌左遷鄜州  
同知歷眞定府通判汝州知州以親老取道歸省遂不赴

王用中明嘉靖丙辰進士授山東平原知縣邑多盜用中立法捕  
緝四境帖然陞戶部主事引疾歸時手一編不輟當事請主雲  
中書院多所造就少受書於從兄用賓事之若嚴父用賓性醇  
篤精舉業屢舉不第嘉靖中以貢知靖海縣告歸讀書課子弟  
與郡中張別駕應武溫撫軍景葵文酒從容號雲中三老鄉論  
敦倫方正者必首王氏兄弟焉

王用賓性醇篤精舉業屢舉不第嘉靖中以貢授靜海知縣未浹  
期意頗厭之投劾歸讀書課子弟時與郡中張通府應武溫撫

軍景葵文酒從容時人號爲雲中三老

張應武明嘉靖間貢生授大城知縣以仁恕爲治稱廉平遷河間府通判益務寬大未幾乞休去應武深經術於易尤邃旣歸後探討不輟子孫多以科名顯

何廷俊廷魁從弟父餘師性孝友工書善詩賦以選貢任青州府經歷用不盡才時論惜之廷俊明萬厯間貢任平陽教授厯知臨潼項城二縣遇旱禱雨輒應蝗不爲災及歸杜門著述中年喪偶不再娶孫大印舉丁卯鄉試官刑部郎

郭中鼎字五黃究心易理樂道不倦順治十二年以薦起丹陽知縣興利除弊不期年威惠大行暇則討論經史手不釋卷卒於

大同縣志

卷十七

人物後

四

任喪歸囊無餘貲士民哭送數十里不絕

張于德居家以孝友著登順治辛丑進士選威遠教授捐俸修學宮月集諸生課文藝尤邃於易理詩學朝夕講貫以闡明經術鼓勵士風爲己任歲歉奉檄散賑多所全活累陞國子助教兵部主事告歸卒

王德馨官廣東守備以武科起家而雅好文翰其書法學董文敏大字尤擅場大同總鎮某甚愛重之每置酒高會輒令作擘窩書興酣落筆皆有矩矱今大小教場牌匾文字及四牌樓坊額其遺墨也

王言經邑廩生性穎敏幼有文名見重於時及授徒講學文昌宮

一時後進從其遊者皆有成就斐然質有其文弟言綱子敏俱爲諸生亦各有聲於庠序間

鄭陟字學山賦性嚴峻守正不阿工詩賦兼精天文手著星宿圖要每指示占候歷驗不爽惜未梓以行世平生文機敏妙後雖年耄偶有所作無不援筆立就不加點竄嘉慶甲子科

欽賜舉人乙丑己巳兩科累

賜國子監助教學正後以歲貢訓導興縣壽八十餘而終

李培芳歲貢生性和平耽志書籍每試必冠軍與孝廉楊得爲莫逆友鄉試輒薦而亦終不售時論惜之

屈天驥歲貢生孝廉朝品子性嚴恪貌亦奇古兼通堪輿矩步方

## 大同縣志

### 卷十七

人物後

五

行不輕言笑有嶽嶽氣概與弟天軼俱以嚴師見稱

王士達文行見重於時以歲貢訓導右玉年八十餘赴京與嘉慶元年千叟宴得邀

欽賜回里越數年而卒孫清舉工書法以端謹稱

楊得字動菴乾隆戊子科舉人文名甚著尤敦內行宗族鄉黨幾於無間言爲學宗近思錄湛深於理以大挑選汾西訓導復補臨晉教諭誨迪庠序諄諄不倦其成就人才今猶稱之任臨晉時歲大侵太守檄楊協襄賑濟楊於古今荒政備悉經緯一時全活甚衆河東數十州縣救荒之策以臨晉爲稱最楊之力也王縝字掌綸縣學貢生生有異質七歲能吟詩蒙師驚訝授書若

夙悟牛角爲文輒高出儕輩甫就試卽冠軍旋食餼凡歲科考必拔前茅見譽於督學者指不勝屈而鄉圍則屢躋雖試草膾炙人口而主司視之平平也故偶薦亦不售享壽六十七以歲貢終時論惜之鱗志潔行芳平居不苟言笑其爲文清超拔俗尤肆力於古文諸大家沉潛經義淹貫子史晚年靜坐一室常兀兀終日一切世態絕不縈懷其庶幾有道之士歟時人有違於親薄於宗鄙者皆羞爲所見更可知其人品矣

姜清元字一齋家素貧舌耕養親有菽水之歡少入泮隨父繁峙把總之任適內翰孫某改官縣令愛其才親爲指授學業大成讀書晉陽書院文名見重一時壬申舉於鄉中甲戌明通進士任絳州學正郡中學業之有師承者今尚推清元云

## 大同縣志

### 卷十七

人物後

六

何士璉字殷爨拔貢生七歲而孤十七歲入縣學家貧授徒本郡隣邑從遊者六七十人掇巍科躋臚仕者有焉士璉自以忠愍後裔以敦族明宗爲己任遭姜逆之變而家譜賴以不墜者士璉力也年八十九沐浴冠帶而終

### 功階

前賢之功勲赫奕者已備著於篇自是而下有以材武著稱者或折衝於疆場或捍禦於鄉邦皆所謂執干戈以衛社稷者也安可以不傳乎若夫忠信以爲甲冑禮義以爲干櫓則吾儒皆然豈惟健士也哉

韓浩任便宜都元帥兼應州彰國軍節度使撫愛軍民具有方畧  
趙翔少材武有膽畧明正統中以軍功累陞宣府副將戰歿於陣  
天順初優予贈卹

李鋹世襲指揮同知累功進都指揮僉事充叅將協守大同明正  
德七年山東盜起詔充副總兵與張俊等邀賊復與傅鎧張椿  
等數立功賊平進都指揮同知充總兵官鎮鳳陽諸府尋以江  
西盜猖獗擢署都督僉事與都御史俞諫同提督軍務賊入據  
裴源山憑高發矢石官軍幾不支鋹下馬持刀督將士殊死鬪  
賊敗走追擒之移駐餘于卒於軍詔贈右都督

焦澤剛毅有謀先以遊擊從總兵周尚文戰彌陀鳳凰山皆先登  
大同縣志  
卷十七 人物後  
七  
論功陞西路叅將明嘉靖間總兵大同邊疆寧謐後移鎮昌平  
掌團營握兵最久家無餘資勲勞茂著鮮有繼者

楊茂春驍勇熟韜畧明萬厯中任指揮僉事累官太原總兵天啟  
初移鎮薊門崇正初以宿將召對便殿詢制禦方畧特命鎮守  
大同絕無烽警後晉秩都督同知賜蟒玉

魯明性果毅習韜畧順治初流寇餘黨竄入雲朔間所至蹂躪明  
慨然詣軍門陳勦撫策從定應朔山陰懷仁諸邑以功守備宣  
府值姜瓖變村堡多煽動明嚴部伍緝奸宄深壘堅壁以待變  
境內帖然累遷至潼關協鎮保障邊陲兵民咸頌其德

郭安字清平由行伍拔補把總雍正元年從征西蹈至三單衛駐



防凱旋以功累陞陽和守備尋超擢襄陽城守營遊擊路當孔道安設法詳請均兵丁勞逸歲省兵役十之四焉漁戶歲納魚六百觔却不受永免陋例後調任襄鎮右營卒於穀城軍民思之立碑平生重然諾好施予同官陳某暴歿逋欠纍纍力爲經紀歸其喪人亦以此多之子士衡乾隆辛卯 恩科成進士

焦埏祖澤父承勲俱總兵官勛勞著嘉隆間埏以世將子喜兵法精騎射以功累官大同副總兵崇正末 大兵及山海關聲勢甚急埏奉命率所部赴援力戰不屈死事聞贈卹有加

楊楨驍勇善騎射弱冠充騎卒時總兵俞益謨目以大器康熙四十二年益謨提督湖廣征紅苗特奏楨爲帳下親兵楨奮勇獨

大同縣志

卷十七

人物後

八

先生擒賊將殺戮甚衆積功授千總尋擢長沙都司鎮府皆倚其能將重任兵民亦咸頌之忽邁疾卒於官年三十六楨姿性英邁嫻韜畧好論關壯繆張睢陽遺事嘗曰山西出將正以忠義過人耳今生聖賢後生無益死無聞是自棄也抱負不凡如此時論交惜

馬光祖字繩武狀貌魁梧多膂力精騎射從征陝西有功雍正間以千總署陽高城守練士卒清軍儲弭盜息民營務整飭內擢京營守備歷巡捕北營遊擊中營叅將皆以廉勤稱乾隆三年推陞江南寧國營叅將屢任未幾卒於官囊無餘貲家人鬻產始克歸其喪

王泰運字興若弱冠充騎兵隸大同鎮麾下總鎮甚器識之征滇南蠻用爲前隊擒二賊首補軍營千總戰輒先登議敘一等功超擢直隸張家口遊擊復從撫遠將軍西路出兵屢建奇績陞河間協副將時多竊盜泰運嚴督官兵分路偵緝立擒渠魁十餘人置之法餘黨盡散民獲寧止乾隆七年移疾歸卒於家畢暎宋平章事士安裔孫精騎射負勇畧成雍正癸卯武進士授花翎侍衛出爲陝西遊擊駐劄西路車營進勦有功陞叅將尋屯田蔡巴什湖著有成效乾隆元年陞慶遠協副將所轄宜山縣白土邱索蠻蠢動暎率所部馳往擒其渠藍明友覃奉恩等擢廣西右江總兵官歷四川建昌廣東右翼二鎮撫緝軍民甚

大同縣志

卷十七

人物後

九

著威惠以年老屢疏乞休不允內陞鑾儀衛鑾儀使卒於官姜居廣字有容父昌宗官新平守備居廣生而穎異好學工書旣而投軍習武乾隆二年成武進士授陝甘督標守備歷橫城都司寧夏遊擊會西陲用兵奉檄領解軍營駝馬往來哈密關展地方備著勞績復赴新疆英阿薩爾駐防嚴營伍清糧餉綏輯協宜以卓薦擢紫荊關叅將子玉德廩貢生以文行見稱

任承緒字叔武重慶總兵諡勇烈次子也幼有卓識喜讀書善騎射年十二補博士弟子員乾隆二十六年以父勲授巡捕京南營千總陞北營西營守備懲豪猾緝鼠竊屏絕苞苴政績稱最琉璃廠有殺人疑獄密訪兇徒江二者夜率邏卒入其室縛之

掘地得屍遂吐實讞成

上喜其能超授南營遊擊明年正月珠市口列肆火馳往手鈎索親率弁兵撲救深入火叢既出旋復入風迴火熾牆崩壓傷重輿歸月餘卒時年二十九承緒沉重寡言蓄智畧慷慨有父風以急公隕身未竟其志時人咸悼惜焉

姜必昌字際雲工書善騎射以材武起行間補千總督建綏遠城累遷貴州安籠鎮標守備都勻都司獨山營遊擊安順提標中軍叅將所至革除陋規體卹士卒皆有清惠聲尋陞黔西協副將值滇南用兵籌辦事宜備著勞績歷二載引疾歸杜門手一編自娛以終

大同縣志

卷十七

人物後

十

孝友

嘗讀漢書至父借耰鋤亦有德色兄操箕箒動相詬誶未常不嘆里巷媮薄自古已然安得愷弟君子使鄉曲之間有所觀感而皆爲孝子悌弟也乎有子曰其爲人也孝弟而好犯上者鮮故有善事父兄者茲皆引善善從長之義以旌揚之蓋所望於世道人心者深且切矣

元

高著居喪廬墓王瑞之累世同居元時表其門閭

明

焦鑑府庠生侍父不離左右家貧必勉致甘旨父卒哀毀柴立匍

匍墓側悲號不少輟所親以滅性非孝勸之鑑曰父亡何歸卽從父於九原固無憾廬墓三年足不入城市成化六年奉詔旌又楊茂楊瑞成化間並以孝旌

張瑞縣學生母卒廬墓父振止之父卒遂廬墓側會烽烟有警堅守不去事聞旌表父由舉人官邳州牧瑞以貢令環縣皆有惠政

盧鉞三歲失母父達不再娶以托寡嫂楊氏遂雲遊八歲忽痛哭曰母則亡矣寧無父乎楊告之故正德間鉞由監生授河南左長史棄官尋父誓不得父不歸數載至平涼泣禱於神依夢往翠屏山遇老人楊譽如夢所見則其父奕友也父歿已久鉞易大同縣志

卷十七

人物後

十一

棺函骨見有棋子爲殉宛然不朽會兵圍平涼鉞獨守柩不離衆曰此中有孝子害之不祥遂解圍去事聞賜達爲義夫贈承德郎鉞爲孝子封亞中大夫旌其閭

武世舉中萬厯己卯鄉試授信陽知縣陞運同居父喪衷毀五日不食繼以嘔血事祖母與母備極孝養所得廉俸盡爲一門婚喪資歸之曰甘心食貧杜門二十六載卒年八十

趙榮貴麻登雲榮貴事嫠母張跬步不離母疾刲股進之終不起哀毀廬墓成疾而卒登雲父剛患寒疾醫曰糞甜則愈嘗之苦哭赴城隍祠祈以身代父思肉食割股以進疾遂愈

朱充燿廷姪鼎燿俱代府宗人也充燿字淑川七歲父俊捺卒哀

毀如成人事母克孝母歿廬墓三載御史疏聞賜旌表廷姪亦  
早孤事母備極孝養言及父輒嗚咽終日萬厯間旌鼎煢奉國  
將軍父病嘗糞祈身代比卒竭力治喪葬時雪甚仰天哀禱忽  
得晴霽事母以孝聞詔賜四品服金千兩

武彥爵冠帶總旗母疾呼天求代尋疾愈比卒哀毀廬墓三年  
郭璘性孝闖賊勒餉代父受刑父名大貴官鄆縣丞多義行鄉里  
稱爲善人父歿璘廬墓三年

溫鉞父景清有膽力嘉靖三年鎮兵殺巡撫張文錦其後巡撫蔡  
天祐令景清密捕首惡戮數人其黨恨之十三年殺總兵李瑾  
因遍索景清深匿不出遂執鉞及其母王氏令言所在鉞曰爾  
欲殺吾父而使我言是我殺父也如讐不可解則殺我舒憤足  
矣賊不聽逼母使言母大罵不輟賊怒支解以怵鉞鉞大哭且  
罵并被殺事平母子並獲旌

國朝

王逢泰拔貢生幼時父之雲携貢兄出遊獨與母楊居姜瓖之變  
母死於井逢泰泣血殯母訖徒步數千里訪父兄倏遇父金陵  
父言汝兄奄逝逢泰聲淚俱咽尋奉父歸里父年八十餘以壽  
卒逢泰詣墓下輒攀柏哀號不能止沒齒不衰前太守葉著孝  
子傳以風世

仝勲字良棟父應實遠去鄉里勲方髻鬣稍長卽辭母求父匍匐

數千里徧歷三吳兩粵間知父已歿號泣負骸骨歸母郝苦節  
終身勲竭力奉養宗黨稱孝焉

張光壁字次侯縣學諸生十二日而母韓卒繼母鄧不答於其  
父光壁方九歲在外塾心動趣歸則鄧將投繯矣急抱持一慟  
幾絕鄧感其誠爲不死後鄧以疾卒父又娶宗氏宗卒娶致氏  
光壁事之益謹致有一弟一兄女俱幼無所倚光壁體母意勸  
父收養之致善病光壁泣曰父老矣飲食寒燠賴吾母卽不起  
如吾父何禱於神祈以身代竟得瘳已而光壁以疾勞成痼疾  
將革猶呼其子惓惓以父母後事爲囑乾隆五年

旌表孝行

大同縣志

卷十七

人物後

十三

王印字君璽少孤貧孝以奉母母痼疾頻年呻吟之聲常達旦印  
籲天求代聞文水縣善醫者匍匐千里往爲之請厥疾乃瘳城  
東李王澗村民某鬻妻償逋慨然解金贖還敦行樂義類如此  
子廷彥慷慨有父風

薛宗堯善力村人家世農業年十二見其父力苦輒請代父不許  
復固請父曰兒幼第工半他傭足矣乃喜終日操作不少輟工  
顧倍焉旣長力任耕作不令老父親胼胝事儉歲甘旨無缺父  
邁疾左右侍奉目不交睫者累月比歿號慟絕而復蘇猶力疾  
營殯葬甫畢嘔血而卒

趙敏孝友性成與弟達昇親愛無間兩弟俱早世撫育孤寡恩義

備至每製一衣嘗一嚮必先兩姪而及其子至課令讀書習騎射稍怠必督過之不少假顏色也後姪登元登高並由武進士起家子登峻亦舉於鄉

苑扶龍年十五父歿祖父母老母嫠居家貧乏子身任勤苦奉養兩世已食嘗不飽而甘脆無缺祖父母相繼歿柴毀骨立以母命節哀有八子漸長家愈貧孝養愈篤母歿日夜哀號竟成痼疾偃臥數載而卒

蕭威天性孝友年十三母見背事繼母劉先意承志劉氏嘗語人曰兒孝如此奚必出腹子哉服賈養父母不有私財撫小弱弟成立同居共爨終其身乾隆二十三年舉鄉飲

大同縣志

卷十七

人物後

十四

陳二嘗爲得勝路兵丁目不知書性甚孝父卞急小過輒鞭扑必長跪受責每久值官府或齎文書他往必告父母依依不忍舍長官聞而重之不令遠役也

康萬倉父性嚴急萬倉已抱孫怒輒撻之流血猶作嬰兒啼孺慕弗哀族弟萬訓伯仲幼孤值歲饑推食撫養之桑梓戚好間憐慨施予今稱者嘖嘖

宋琦家貧與兄璟竭力奉母旣而兄歿恐傷母氏心孝養益至撫從孫德成人孝友傳於閭里母年九十餘琦近七旬一堂五世有雍睦之風

路璵字孚尹先世皆以武顯璵生而聰穎耽書史弱冠補弟子員

旋食餼名噪鬻序父患血瘤侍湯藥衣不解帶者累月待弟尤友愛飲食衣服從無私積聽室中有詬誶聲輒自引咎嘗書博覽多聞見寡交少是非二語以自警不愧名言

郭全進士郭士衡之子全由行伍擢任乃河把總時士衡官雲南定遠縣尹全以久違定省終日怏怏及聞父年老告休將旋里全卽日引退迎於中途時有留之者全曰古人一日養不以三公換吾何戀此末弁哉全母吳氏早卒繼母柴氏性悍曲意承順備得歡心析箸時父獨厚數百金固辭不允仍充公費不入私囊尤人所難者

張師孔字效先貢生九歲失怙母董氏矢志撫孤時與伯叔同居

## 大同縣志

### 卷十七

人物後

十五

家故殷實而日令董勤操作師孔服役於爨薪間不少休母對之泣師孔雖在髻鬣多方慰藉母爲解顏比析箸後其夫婦事奉孀母備極孝養有祖遺生業在綏遠城年久廢墜其伯叔委之師孔不數年生業增盛仍平分親屬不少私合前後觀之勞者人所避則任而不怨財者人所欲則公而不吝家庭之間可以風矣

郭萬源縣學附生父安任四川雅州守備源隨任讀書爲父所鍾愛父卒扶襯歸不得於繼母逐之出源百計糊口無幾微見於顏色事繼母孝養備至友愛諸異母弟益摯比入縣庠則貧窮愈甚而諸弟坐享豐腴源對之怡如也訓蒙於解家莊聊以自



給後數年間諸弟皆蕩產無賴母子饔飧不繼源竭館穀以濟之村人感其孝行歲爲增俸

董自新字德明幼失怙歷事繼母楊又繼母白皆克盡孝養不違親心其異母弟作新攻舉業自新培養備篤乾隆己酉作新以選拔得雋論者謂非其兄之殷勤勸勉不至此以此見稱於時年六十始得子壽八十有五蓋生平孝友所致云

夏新泰母喪盡禮哀動隣里寢苦三日水漿不入口衆親屬戒以毀不滅性始勉就食嘉慶元年邑中公舉孝廉方正新泰力辭不赴

李翰謙縣學生員生有至性事孀母先意承志無微不備母中年

## 大同縣志

### 卷十七

人物後

十六

患嗽症時發時止翰謙衣不解帶率以爲常初少孤弟方周歲翰謙曲體親心維持調護以底成立故翰謙沒二十餘年而其弟思其友愛未嘗不潸然淚下長子鍾岳舉人次三皆諸生

### 行義

三代而上患在好名三代而下患在不好名故立身清介者以沽名市惠爲汚然士生斯世安能以聖賢之道律人哉苟有可愧薄俗興民行者君子有取焉所謂一節之善是也况霜寒土瘠之區歲比不登有能如馮公之焚券於薛陳氏之家量貸而公量收則蚩蚩者氓其免於流亡者衆矣傳曰行而宜之有利於民曰義故備書之以爲鄉曲之士好行其德者勸

元

賈進大德九年地震民居多傷且乏食進給酒藥炭火濟之每歲冬製木棉裘數百襲以衣寒者買地爲義阡使無墓者葬之有司以聞上以好義旌其閭

明

沈文義嘗以父病走恒嶽祈代果獲痊生平讀書好義置莊田五十畝以助族人貧不任婚喪者商文恪輒嘉其行誼爲立傳李滿孝悌力田與人無忤見人有急輒罄所有濟之歲大饑出穀爲賑夜夢神人語之曰帝鑒爾德後且貴二子承弼承式果相繼取科第

大同縣志

卷十七

人物後

十七

陸應祥兄弟俱早歿祥以一身摒擋家務男婦百口衣食必均人各授其事不令曠廢所得升斗尺寸毫不入私橐歷四十餘年六世同居人無間言時方之張公藝云

高邦暨代府儀賓隱居自適多義行所居毗連縣學有司謀拓學舍撤其宅益之竟不受價

王琳貢生有學行事繼母撫幼弟以孝友稱賑饑掩骼人多其

高義

賀魁縣學廩生天性孝友極貧教授生徒供甘旨有餘以周族人婚喪之事多爲藉賴焉

杜廷相涉書史通曉世務嘗言臨民之事非涼德可勝吾姑爲其藏者遂絕意仕進隱於農嘗拒鄰婦遺金人以此重之鄉人有

不平輒就質無不愧服而云

國朝

楊宦徐堡村人慷慨好義多膂力順治戊子姜逆黨恣行擾掠百姓憤甚潛結里中少年奮白挺乘懈擊殺賊數人乃散走村民獲安嘗捐金修建神泉河橋城隍文昌祠周卹貧困助人婚喪不可枚舉耆老至今稱述之孫培初以吏除江西龍泉縣北鄉司巡檢有能聲

武嵩齡幼孤隨兄奉母遷畿南年十五母卒扶櫬歸葬遍覓父塋號泣數日乃得遂以合葬修學宮周貧乏又多義行焉後官至天津守備

大同縣志

卷十七

人物後

十八

靳皇柱康熙三十八年大疫煤窯傭率六七人聚一土室病者恐轉相染輒掖出之多野死皇柱別構窯房數間以棲病者而雇人煮糜粥飼之多全活又置地二十畝爲義塚後長子之璠膺選貢次子之璵中康熙癸酉武舉以爲行義之報云

樊榮候推守禦所千總性孝友父棄孕妾於外旣而生男父歿收養之至於成立他若施藥施櫛修橋梁焚契券好善不倦甚爲鄉里所稱兄泰亦慷慨尚義城西小站口至雲崗二十里山路嶮巖南則河壩泥淖行旅病涉泰倡義捐貲修石棧工未半而歿榮竭力踵成之至今利賴

楊光烈以耕讀養親喜緩急人不避勞怨會歲饑乏食里民范某

閻某鬻妻爲苟活計光烈勸阻之量給錢米范感悔而閻不從  
乃詣縣白其事予閻杖并罪買者自是鬻妻之風息縣令嘉其  
公義給額旌獎

戴爾誠父之明白徐溝來徙母喪廬墓多善行以孝義稱爾誠孝  
思尤篤侍父疾歷年無倦色及歿扶服頓踊晝夜號哭幾滅性  
母泣諭之乃止母歿哀毀如父喪里人趙某傭於外妻死子幼  
貧無以斂予之棺婢紅兒者及笄而姝擇佳耦資而嫁之築孤  
店村河堤立留養局皆捐貲爲鄉里倡能以義行世其家云

王廷弼字鼎臣貢生性孝侍母疾五載罔懈宗黨稱之尤好施急  
人患難有貲財不償者輒還共券乾隆庚辰歲歉捐資助賑居  
大同縣志 卷十七 人物後 十九  
鄉醇謹謙退以書翰自娛晚年舉鄉飲五世同堂人謂厚德之  
報

孫光正年二十父母並歿 田產於兄而自傭販繒家旣而往來  
瀋陽經營貿易者十餘年積資漸饒而販繒家中落虧董姓母  
金盈千光正慨然償之人服其義

郭淵縣庠生事父母以孝聞家素封而行義不怠族黨貧乏者多  
賴焉乾隆庚午歲饑居民乏食淵出粟千石輸之官按口借給  
全活甚衆凡有緩急無弗予晚年積券盈篋度不能償者悉召  
至前對焚之曰母貽他日爭端也有司高其義給匾獎勵

燕奇居積頗饒裕而樂善好施修十里河橋築煙嶺村壩鄉民李

某已聘而貧不能娶奇贈金俾得婚配焉王某父故露尸無以葬奇買棺殮殮之前令胡方騰爲作燕義士傳子世德貢生承父志築黃崖堤壩水不爲患貧人閭某將鬻子求食世德量力賙給之父子賴以完聚雍正十年前令陳世寶舉鄉飲

李遇春字長青性慷慨多膂力急人患難雍正間偕數十人行有寶元號者亦行至一谷口與羣竊遇春等毅而待賊捨之去衆皆喜遇春曰賊以我衆不敢逼寶元在後人寡必不免且與人同行而不同患非夫也躍馬追三四里及之發矢斃一賊餘皆遁去義聲聞於遠近

仝有恒字樂田孝子仝勲之子也家貧服賈養親往來燕趙間積

## 大同縣志

### 卷十七

人物後

二十

十年漸致饒裕性慷慨喜賙卹同里某挈妻子入都無所遇落魄瀕死一女鬻豪家矣亟解囊代償觸豪怒幾爲所窘辱賴太原楊御史雅重有恒力左右之卒贖以還鄉人客京師者病施藥歿致賻解衣推食指不勝屈其篤於桑梓誼如此子瑞邑博士弟子以孝聞好義尤篤縣學宮牆久不修治至乾隆庚寅辛卯間傾圯殊甚會當事者議修葺瑞率勸紳士捐貲佐理不避勞怨廟貌煥然一新

郭昌字盛之監生性孝友喜施予年三十喪母事繼母生養死葬盡禮盡哀多有不知其爲繼母者撫堂弟遺腹子俾成立爲娶婦置產不啻已出康熙辛卯歲歉鄉里窮乏不能自存者昌捐

積粟量口調給清源耿某貿易虧資窮困欲死昌憐之義贈百金不責其償也後耿營運獲大利每對人頌昌之厚德云  
張瑛性仁慈輕財尚義少以目疾廢書遇貧士膏火不給樂飲助焉嘗買一婢甫八齡憐而女畜之越六載其父持銀來詰銀所自則轉賣作妾叱之去亟爲擇偶晚歲家漸落有旁屋數間屠羊者賃爲肆可獲三十緡瑛曰若歲剝羊以千計皆生入吾門而死出之吾不忍見也謝却之屠者爲之改業

孫正忠幼貧以傭賃奉母克盡孝養性勤儉尚義積資稍裕輒喜緩急人有盧姓者賈七年不歸母老貧不能活受錢二十緡將醮其媳正忠如數遺之令勿嫁未幾而盧還雍正間歲饑日施米五升以盡爲度後雖有年亦如之享壽九十四今其後人每年於塔寺街觀音殿出俸錢十二千設館延師以訓童蒙貧人子弟無力就傳者任附之亦好義之繼也

萬思榮天性友愛同胞六人思榮最幼事諸兄無間言叔兄早世遺女方襁褓撫如己出歲饑破產調濟多所全活年逾八十而好義彌篤其時有石國璉者亦以義行聞於鄉

張仰賢嘗居懷仁之碾壩村以陶埴爲業四老山地磽确又早霜秋賦無抵偏災例不得援免村民苦之仰賢出已資詣縣盡數代納以義稱方九歲時祖父母相繼歿與弟妹依祖母姚伶仃孤苦越數年姚歿喪葬盡禮弟妹俱婚嫁家計漸饒而助人

之婚喪食人之孤寡大懷兩邑爭述之

郭維翰字山甫歲貢生其先世居雷公村故祖塋猶在焉乾隆五十二年歲大荒村中啼饑者三十餘戶維翰念先人桑梓地計口給粟不少吝老幼妻孥不致離散維翰一人力也平居訓子弟曰處世要存心讀書要立志次子垣孝友義行克繼其志以歲貢選虞鄉訓導長與三皆諸生兄維新亦義行見稱於世申君昭幼以貿易廢學乾隆五十二年歲大侵君昭經商寧夏發船輸粟百餘石運至家分給親族一時宗黨賴以全活初君昭在歸化城恒豐號財夥十家生業中敗負人者甚多君昭每以是爲耿耿十餘年後復至歸化貼報單於通衢令當年受負者各持券至如數償之至今侈爲美談

大同縣志

卷十七

人物後

二十二

李逢春安寺子村人乾隆五十二年歲荒逢春時役里長里有彭家窪地素瘠遇凶年絕粒無收村中男婦老幼逃竄無子遺逢春見而哀之時官逋甚急議將該村房產召衆分授以納賦然饑饉洊至人無應者逢春獨罄貲代完官逋邑令嘉其義逾年雨暘不愆漸可耕種邑令以該村房地盡畀逢春歲納官糧逢春經紀周密至乾隆五十八年漸有携老弱歸鄉復業者逢春各以其原產歸之皆有生全之樂嗚呼使無逢春其人者則村爲邱墟田舍廬墓狼羣鼠宅安可問哉君子曰此之謂市義崔榮貴性端方雖饒於財然好施與明大義乾隆五十二年歲大

饑遇貧乏多方周卹不少吝待其濟而舉炊者指不勝屈故閭里皆德之晚年尤篤於義見窮困負債者其子弗取長子琳增廣生次子珍亦敦友愛有父風父卒取諸貧人借券盡付於火以成父志

楊得靈縣學武生其祖國琇當乾隆壬戌郡中荒旱國琇獨出已貲代合城內外完納國課蓋不忍枵腹者受敲扑也時當事書有長者風四字以贈之不愧矣至得靈遇乾隆丁未大稔其時官設廠賑饑得靈竭力其間使惠無不周而膏不上屯復於陳家莊施義塚以收道殣有祖風焉

王正時佛堂寺貢生村西南馬峯山峪口每驟雨急漲山沙壅塞

## 大同縣志

### 卷十七

人物後

二十三

有傷田畝正時盡力築攔沙堰得免水患居民賴之此所謂一節之可取者也 自鴈門關外傍山依麓其地或漬於沙或變於城皆山水瀾漫故也有能明農者爲地方調護則轉瘠爲沃不難矣

張光甲字鼎元以功授薩拉齊把總時薩拉齊新設隸歸化城兵民雜處光甲操練之暇必親講

聖諭廣訓十六條一時藁爾之區孝弟成風光甲之力也子錦任河保千總與河曲尹孫立夫友善故子得就學孫蓋江南陽湖名宿丁未探花淵如先生尊甫也

李大富高家莊人自其太高祖傳至其祖兄弟三人其父兄弟五



人俱同居共財昆季相友善至大富輩則兄弟十二人而子姪輩兄弟十九人尚守高曾矩矱無私財無異食耕讀必勤起居維謹今大富等孫亦已見四人矣一家男女八十三名口雖編戶齊民頗得陸象山先生家規遺範古所稱義門者是歟

龔德駱駝坊村人監生乾隆五十二年歲大饑德出米五十石穀六十石按口給借村衆賴以全活時城中設官廠德復隨衆助賑五十三年春饑民猶衆德與版築令村傭者給其值使予者有名受者不愧外村投荒者日幾百人皆飼之以粥此皆深達荒政之宜者也

楊儒林西谷莊人現年八十一歲子三人孫七人曾孫八人元孫

## 大同縣志

### 卷十七

人物後

二十四

二人五世同堂四十餘口雍睦和順少長有禮亦盛氣之所鍾也

李世佐性愛急人之難同城有郭玉者其父貧不能自存乃鬻子爲優世佐聞哭泣聲詢隣人得其詳嘆曰父子離散且沒良爲賤人情所不忍也傾囊償其值焚券贖歸

吳翥鳴當乾隆五十二年大荒村中老幼孤苦百餘口嗷嗷待哺翥鳴與姪瑄每朔望按口給食賴以全活家中不貲尤人所難田昌慶乾隆五十二年歲饑官設賑廠司事者多不盡力昌慶昕夕匪懈視家事爲尤勤故一時長官多器之最難者荒後瘟疫流行道殣相望好善者施棺掩殞則爲盡心焉耳已昌慶慮其

掩埋不固終不免於暴露爲狐狸食也與同事張仰賢不避傳染每日身親其勇於義者歟

孫緒前字世裕每遇人窮困迫不欲生或勢欲離散必竭力資助以周全之其族姪婦與郝姓甥女皆得以從一終其事尤著嘗有比鄰誤認其雞攘之歸緒前怡然聽之後鄰雞自歸其人慙謝其寬容多類此

### 寓賢

雲中居天下之極北遷客騷人無因而至乃宋之使臣明之謫戍古今如相輝映

本朝復有朱竹垞先生裙屐風流山川生色信乎地之以人傳也

## 大同縣志

### 卷十七

人物後

二十五

昔蘇子卿海上看羊而河梁贈答爲千古壇坫之宗則塞外之有寓賢寓賢之有文章也曩乎尚矣

高聰字僧智本渤海蓊人其先徙居北海之劇縣父法昂宋員外郎早卒聰少育於祖母王魏師克東陽徙入平城與蔣少游爲雲中兵戶窮困甚族祖允視之若孫大加賙給聰涉獵經史頗有文才允數稱於朝拜中書博士正光初仕至光祿大夫

任延敬廣寧人伯父桃太和中爲雲中軍將延敬隨之因家焉太昌初累轉尚書左僕射位望旣重能以寬和接物人士稱之及斛斯椿讞發延敬棄家北走至河北郡率士民據之以待高祖天平後再爲侍中卒贈太保

朱弁字少章徽州婺源人少穎悟讀書日數千言既冠入太學晁說之見其詩奇之與歸新鄭妻以兄女新鄭介汴洛間多故家遺俗弁遊其中聞見曰廣靖康之亂家碎于賊弁南歸建炎初議遣使問安兩宮弁奮身自獻詔補修武郎借吉州團練使爲通問副使至雲中見黏罕邀說甚切黏罕不聽使就館守之以兵弁復與書言用兵講和利害甚悉紹興二年金人忽遣宇文虛中來言和議可成當遣一人詣元帥府受書還虛中欲弁與正使王倫探策決去留弁曰吾來固自分必死豈應今日覲倖先歸願正使受書歸報天子成兩國之好蚤申四海之養於兩宮則吾雖暴骨外國猶生之年也倫將歸弁請曰古之使者有

大同縣志

卷十七

人物後

二十六

節以爲信今無節有印印亦信也願留印使弁得抱以死死不腐矣倫解以授弁弁受而懷之臥起與俱金人迫弁仕劉豫且誅之曰此南歸之漸弁曰豫汝國賊吾嘗恨不食其肉又忍北面臣之吾有死耳金人怒絕其餼遣以困之弁固拒驛門忍饑待盡誓不爲屈金人亦感動致禮如初久之復欲易其官弁曰自古兵交使在其間言可從從之不可從則囚之殺之何必易其官吾官受之本朝有死而已誓不易以辱吾君也且移書耶律紹文等曰上國之威命朝以至則使人夕以死夕以至則朝以死又以書訣後使洪皓曰殺行人非細事吾曹遭之命也要當舍生以全義爾乃具酒食召被掠士夫飲半酣語之曰吾已

得近郊某寺地一旦畢命報國諸公幸座我其處題其上曰有  
宋通問副使朱公之墓於我幸矣衆皆泣下莫能仰視弁談笑  
自若曰此臣子之常諸君何悲也金人知其終不可屈遂不復  
強王倫還朝言弁守節不屈帝爲官其子林賜其家銀帛會黏  
罕等相繼死滅弁密疏其事及金國虛實曰此不可失之時也  
遣李發等間行歸報其後倫復歸又以弁奉送徽宗大行之文  
爲獻其辭有曰歎馬角之未生覓消雪窖攀龍髯而莫逮淚灑  
冰天帝讀之感泣官其親屬五人賜吳興田五頃帝謂丞相張  
浚曰歸日當以禁林處之八年金使烏陵思謀石慶充至稱弁  
忠節詔附黃金三十兩以賜十三年和議成弁得歸入見便殿

大同縣志

卷十七

人物後

二十七

弁謝且曰人之所難得者時而時之運無已事之不可失者幾  
而幾之藏無形惟無已也故來遲而難遇惟無形也故動微而  
難見陛下與金人講和上返梓宮次迎太母又其次則憐赤子  
之無辜此皆知時知幾之明驗然時運而往或難固執幾動有  
變宣鑑未兆盟可守而詭詐之心宜嘿以待之兵可息而銷弭  
之術宜詳以講之金人以黷武爲至德以苟安爲太平虐民而  
不恤民廣地而不廣德此皆天助中興之勢若時與幾陛下既  
知於始願圖厥終帝納其言賜金帛甚厚弁又以金國所得六  
朝御容及宣和御書畫爲獻秦檜惡其言敵情奏以初補官易  
宣教郎直秘閣有司校其考十七年應遷數官檜沮之僅轉奉

議郎十四年卒弁爲文慕陸宣公援據精博曲盡事理詩學李  
義山詞氣雍容不蹈其險怪奇澁之弊金國名王貴人多遣子  
弟就學弁因文字往來說以和好之利及歸述北方所見聞忠  
臣義士朱昭史玩張中輔高景平孫益孫谷傅偉文李毋五臺  
僧寶眞婦人丁氏晏氏小校閻進朱勣等死節事狀請加褒錄  
以勸來者有聘遊集四十二卷書解十卷曲洎舊聞三卷續飢  
餓說一卷風月堂詩話三卷新鄭舊詩一卷雜書一卷南歸詩

文一卷

錄宋史

洪皓字光弼番禺人少有奇節慷慨有經畧四方志登政和五年  
進士第王黼朱勣皆欲婚之力辭宣和中爲秀州司錄大水民

大同縣志

卷十七

人物後

二十八

多失業皓白郡守以拯荒自任發廩損直以糶民至集皓恐其  
紛競乃別以青白幟涅其手以識之令嚴而惠徧浙東綱米過  
城下皓白守邀留之守不可皓曰願以一身易十萬人命人感  
之切骨號洪佛子其後秀軍叛縱掠郡民無一得脫惟過皓門  
曰此洪佛子家也不敢犯建炎三年五月帝將如金陵皓上書  
言內患甫平外敵方熾若輕至建康恐金人乘虛侵軼宜先遣  
近臣往京營俟告辨回鑾未晚時朝議已定不從旣而悔之他  
日帝問宰輔近諫移蹕者謂誰張浚以皓對時議遣使金國浚  
又薦皓於呂頤浩召與語大悅皓方居父喪頤浩解衣巾俾易  
墨衰經入對帝以國步艱難兩宮遠播爲憂皓極言天道好還

金人安能久 中夏此正春秋邲郢之役天其或者警晉訓楚也帝悅遷皓五官擢徽猷閣待制假禮部尚書爲大金通問使龔璫副之令與執正議國書皓欲有所易頤浩不樂遂抑遷官之命時淮南盜賊踵起李成甫就招卽命知泗州羈縻之乃命皓兼淮南京東等路撫諭使俾成以所部衛皓至南京比過淮南成方與耿堅共圍楚州責權州事賈敦詩以降敵寶持叛心皓先以書抵成成以汴涸虹有紅巾賊軍食絕不可住皓聞堅起義兵可撼以義遣人密諭之曰君數千里赴國家急山陽縱有罪當稟命于朝今擅攻圍名勤王實作賊爾堅意動遂強成歛兵皓至泗境迎騎介而來龔璫曰虎口不可入皓遂還上疏

大同縣志

卷十七

人物後

二十九

言成以朝廷餽餉不繼有引衆建康之語今靳賽據揚州薛慶據高郵萬一三叛連衡何以待之此含垢之時宜使人諭意優進官秋畀之以京口綱運如晉明帝待王敦可也疏奏帝卽遣使撫成給米五萬石頭浩惡其直達而不先白堂奏皓託事稽留貶二秩皓遂請出滁陽路自壽春由東京以行至順昌聞羣盜李閻羅小張俊者梗穎上道皓與其黨遇譬曉之曰自古無白頭賊其黨悔悟皓使持書至賊巢二渠魁聽命領兵入宿衛皓至太原留幾一年金遇使人禮日薄及至雲中黏罕迫二使仕劉豫皓曰萬里銜命不得奉兩宮南歸恨力不能磔逆豫忍事之邪留亦死不卽豫亦死不願偷生鼠狗間願就鼎鑊無悔

黏罕怒將殺之旁一酋喏曰此真忠臣也目止劔士爲之跪請得流遞冷山流遞猶編竄也惟璫至汴受豫官雲中至冷山行六十日距金主所都僅百里地苦寒四月草生八月已雪穴居百家陳王悟室聚落也悟室敬皓使教其八子或二年不給食盛夏衣麤布嘗大雪薪盡以馬矢然火煨麪食之或獻取蜀策悟室持問皓皓力折之悟室銳欲南侵曰孰謂海大我力可乾但不能使天地相拍爾皓曰兵猶火也弗戢將自焚自古無四十年用兵不止者又數爲言所以來爲兩國事旣不受使乃令深入教小兒非古者待使之禮也悟室或答或默忽發怒曰汝作何事而口硬如許許謂我不能殺汝耶皓曰自分當死顧大

大同縣志

卷十七

人物後

三十

國無受殺行人之名願投之水以墜淵爲名可也悟室義之而止和議將成悟室問所議十事皓條折甚至大畧謂封冊乃虛名年號本朝自有金三十兩景德所無東南不宜蠶絹不可增也至於取淮北人景德載書猶可覆視悟室曰誅投附人何爲不可皓曰昔魏侯景歸梁梁武帝欲易以姪蕭明於魏景遂叛陷臺城中國決不蹈其覆轍悟室悟曰汝性直不誰我吾與汝如燕遣汝歸議遂行會莫將北來議不合事復中止留燕甫一月兀術殺悟室黨類株連者數千人獨皓與異論幾死故得免方二帝遷居五國城皓在雲中密遣人奏書以桃梨粟麪獻二帝始知帝卽位皓聞祐陵訃北嚮泣血旦夕臨諱日操文以祭

其辭激烈舊臣讀之皆揮涕紹興十年因諜者趙德書機事數萬言藏故絮中歸達于帝言順昌之役金人震懼奪魄燕山珍寶盡徙以北意欲捐燕以南棄之王師亟還自失機會今再舉尚可十一年又求得太后書遣李微持歸帝大喜曰朕不知太后寧否幾二十年雖遣使百輩不如此一書是冬又密奏書曰金已厭兵勢不能久異時以婦女隨軍今不敢也若和議未決不若乘勢進擊再造反掌爾又言胡銓封事此或有之金人知中國有人益懼張丞相名動異域惜置之散地又問李綱趙鼎安否獻六朝御容徽宗御書其後梓宮及太后歸音皓皆先報初皓至燕宇文虛中已受金官因薦皓金主聞其名欲以爲翰

大同縣志

卷十七

人物後

三十一

林直學士力辭之皓有逃歸意乃請於叅政韓昉乞於眞定或大名以自養昉怒始易皓官爲中京副留守再降爲留司判官趣行屢矣皓乞不就職昉竟不能屈金法雖未易官而曾經任使者永不可歸昉遂令皓校雲中進士試蓋欲以計墜皓也皓復以疾辭未幾金主以生子大赦許使人還鄉皓與張邵朱弁三人在遣中金人懼爲患猶遣人追之七騎及淮而皓已登舟十二年七月見于內殿力求郡養母帝曰卿忠貫日月志不忘君雖蘇武不能過豈可捨朕去邪請見慈寧宮帝人設簾太后曰吾故識尚書命撤之皓自建炎已西出使至是還留北中凡十五年同時使者十三人惟皓邵弁得生還而忠義之聲聞於



天下者獨皓而已皓既對退見秦檜語連口不止曰張和公金人所憚乃不得用錢塘暫居而景靈宮太廟皆極上木之華豈非示無中原意乎檜不懌謂皓子适曰尊公信有忠節得上眷但官職如讀書速則易終而無味須如黃鐘大呂乃可八月除徽猷閣直學士提舉萬壽觀兼權直學士院金人來取趙彬等三十人家屬詔歸之皓曰昔韓起謁環于鄭鄭小國也能引義不與金旣限淮官屬皆吳人宜留不遣蓋慮知其虛實也彼方困於蒙九姑示強以嘗中國若遽從之謂秦無人益輕我矣檜變色曰公無謂秦無人旣而復上疏曰恐以不與之故或致渝盟宜告之曰俟淵聖及皇族歸乃遣又言王倫郭元邁以身徇

大同縣志

卷十七

人物後

三十二

國棄之不取緩急何以使人檜大怒又因言室撚寄聲檜怒益甚語在檜傳翌日侍御史李文會劾皓不省母出知饒州明年大水中官白鏐宣言燮理乖盭洪尚書名聞天下胡不用檜聞之愈怒繫鏐大理獄尋流嶺表諫官詹大方遂論皓與鏐爲刎頸交更相稱譽罷皓提舉江州太平觀鏐初不識皓特以從太后北歸在金國素知皓名爾尋居母喪他言者猶謂皓睥睨鈞衡終喪除饒州通判李勤又附檜誣皓有欺世飛語責濠州團練副使安置英州居九年始復朝奉郎徙袁州至南雄州卒年六十八死後一日檜亦死帝聞皓卒嗟惜之復敷文閣學士贈四官久之復徽猷閣學士諡忠宣皓雖久在北廷不堪其苦然

爲金人所敬所著詩文爭鈔誦求鉅梓旣歸後使者至必問皓爲何官居何地性急義當艱危中不少變懿節后之戚趙伯璘隸悟室戲下貧甚皓賙之范鎮之孫祖平爲傭奴皓言於金人而釋之劉光世庶女爲人豢豕贖而嫁之他貴族流落賤微者皆力拔以出惟爲檜所嫉不死於敵國乃死於讒慝皓博學強記有文集五十卷及帝王通要姓氏指南松漠紀聞金國文具

錄等書

錄宋史

章誼字宜叟建州浦城人登崇寧四年進士第累官徽猷閣直學士樞密都承旨紹興四年大金遣李永壽王翊來使議遣大臣爲報使叅政席益以母老辭薦誼爲代加誼龍圖閣學士充軍

大同縣志

卷十七

人物後

三十三

前奉表通問使給事中孫近副之誼至雲中與黏罕悟室論事不少屈

滕茂實字秀穎杭州臨安人政和八年進士靖康元年以工部員外郎假本部侍郎副路允迪出使爲大金所留憂憤成疾卒於雲中

閻進隸宣武建炎初遣使通問至雲中爲大金所留凡三亡乃見殺武校尉朱勣亦從至雲中不半月亡去追之還勣含笑死挺下

孛要合汪古部人父阿刺兀思剔吉忽里從太祖攻克有功歸鎮本部尋卒其母攜之居雲中太祖旣定雲中賜與甚厚從攻西

城封北平王

劉秉忠字仲晦其先瑞州人天寧虛照禪師遣徒招致爲僧以其能文詞使掌書記後遊雲中留居南唐寺世祖在潛邸海雲禪師被召過雲中聞其博學多材藝邀與俱行旣入見應對稱旨屢承顧問海雲南還秉忠遂留藩邸至元初拜光祿大夫位太保參預中書省事雖位極人臣而齋居蔬食終日澹然不異平昔自號藏春散人

仰瞻長洲人爲大理寺丞正統 宦官王振用事百官多奔走其門惟瞻與大理卿薛瑄不往 與瑄辨殺夫冤獄益忤振下獄  
謫戍大同景泰初召爲右寺丞執法愈堅

大同縣志

卷十七

人物後

三十四

王理江西安福人官刑科給事中正統十一年謫戍大同景泰初起原官陞四川布政司叅議

李左修江西吉水人福建僉事正統六年謫戍大同以經學淑人都御史孫祥布政使郭紀皆受業其門

全寅安邑人少瞽而聰警學京房易占斷多奇中名聞四方正統間客遊大同

盧璣浙江松陽人進士成化八年謫戍大同遂於理學士多從之遊

馮杰直隸任邱人官禮科給事中謫戍大同士大夫多從之遊後

回籍

朱彝尊字錫鬯秀水人嘗遊大同望李陵臺入太原訪卦山蒙山  
晉水諸勝雅嗜金石文搜剔窮巖敗塚遇殘碑斷碣手自摩挲  
竟日不忍棄去夙有子猷癖雖儻舍必擇有竹地以居客大同  
地寒無竹嘗藝葦以代之後舉博學宏詞官檢討

李因篤字天生陝西富平人博學工詩文蘭州刺史綬嘗刊其秋  
興詩沉雄蒼鬱騷壇胥推伏焉文亦瞻整有體格後舉博學鴻  
詞官翰林院檢討秀水曹司農溶備兵陽和因篤以故人子從  
時守大同者以禮敦延掌教雲中書院因善代州馮觀察雲驤  
雅愛其風土人物居勾注夏屋間者十年

仙釋

大同縣志

卷十七

人物後

三十五

不俗卽仙骨多情乃佛心蓋奇山秀水名字古畫尚足以益人  
神智況在人乎羽衣方外之流其人每多翛然拔俗之概若曰  
天下豈有神仙神仙皆妄言耳是亦未足與論人物矣

金

圓滿西京大普恩寺僧天會中修建寺宇功行精勤江東朱弁爲  
之記

元

張可曇生於世祖初幼好道棄家業雲遊山水間年幾百歲童顏  
不衰過交城止棲霞觀嘗作偈云清風常在伴明月幾時休去  
去依然在呵呵一石頭人呼爲石頭道人時值重陽語衆人曰

明年此日我乃與汝等別矣至期果尸解時至正元年九月九日也  
印簡俗姓宋世業儒年十一祝髮佛書無所不通及王公問治民道必以儒術爲先後遊雲中住華嚴寺年五十六示寂荼毘日煙焰所至皆成舍利

明

劉橋東遇異人授皇極數遂精卜筮能預知來問人姓名及富貴貧賤爲人談休咎多奇驗巡撫賈召試其術指座上少年問之按其數曰針工也屢試十不失一大同人王宇方爲諸生爲占一數日時維辛卯歲折得桂枝歸已而果然

大同縣志

卷十七

人物後

三十六

任榮世業醫至榮益精尤好神仙術宏治元年年六十無疾卒踰年鄉人陳守過陳州見榮施藥市口大驚曰公無恙耶榮笑曰然固未死也嘉靖壬辰大同黃令妻父張遇道人於伏牛山曰我大同任榮也公去某日當與小孫會幸傳道之異口張果晤其孫言盡符萬曆二年大同張省祭抵湖廣艾御史所艾家人經武當山見草菴中道士兀坐謂之曰爲我告張省祭歸語任榮子孫榮俟宮殿畢或當歸也言畢忽不見凡三露踪跡云任服遠者榮之後亦以善醫稱有人病垂死脉絕醫相顧聘貽莫敢措手服遠最後至診之曰此轉關脉也脉在肘間一藥而愈其神妙多類此

覺同姓康幼慧讀書過目不忘能文辭尤工臨池書善化寺讚數  
千言咸珍爲名翰時人讚曰續佛慧命湛然清淨遐邇聞聲詩  
禪草聖大同白衣菴僧方俊通釋典工楷書寫泥金經百函亦  
爲沙門所重  
一齋地藏菴僧持戒律甚嚴終日兀坐一室外別無所有施金帛  
多不受受亦隨施貧者不留其餘或雨雪則累日不舉火苦行  
三十年一日沐浴跌坐化

國朝

常修號潤普本姓楊棄家雲遊山水後卓錫於都門之愍忠寺苦  
持戒行日誦法華經一部歷四十餘年請爲大和尚歲傳戒三

大同縣志

卷十七

人物後

三十七

壇弟子數千人年七十五端坐說偈而逝

尺木和尚深於內典率曰詩文雖不甚高脫間有可取近選晉風  
者錄入二絕句亦有曠淡之味順治九年忽自營龕壠手書語  
錄數則而逝

技術

士君子不爲良相則爲良醫蓋天文地理名物象數無不淹通  
條貫而後能功參造化道合陰陽則醫與相其理一也存心濟  
物而於物有濟君子之用心也如是而已志人物而及此所謂  
舉既往以勸來者其可沒人之善也乎哉至若工倕之巧亦足  
以傳示無窮惜乎其不多見耳

北魏

蔣少游本樂安博昌人配雲中爲兵性機巧頗能刻畫有文思遂留寄平城以傭書爲業被召爲中書寫書生用高允薦補中書博士及詔尚書李冲等議定衣冠於禁中少游巧思令主其事後於平城將營太廟太極殿遣少游乘傳詣洛量準魏晉基址高祖修舡乘除都水使者遷前將軍兼作大匠仍領水池湖泛戲舟楫之具及華林殿修舊增新改作金墉門樓皆所措意尋兼太常少卿都水如故嘗爲太極立模範與董佖王遇等參建之未成而卒

明

大同縣志

卷十七

人物後

三十八

李春先世爲雲中名醫精研脉理全活多人趙代皆呼爲李仙

國朝

張文耀字會公因母平氏痼疾頻年潛心醫理卒致痊可尤精於傷寒診高某起死回生郡人至今頌之

高麟昭松潘總兵鼎第五子隨兄宦見刑鞫人輒掩面流涕以故不肯仕讀醫書有神解治奇疾多效關南北爭延致之年八十  
三無疾而卒先一月與家人期如其言

張國槐廩生通醫藥尤精傷寒懸壺永泰街顏其居曰杏雨齋活人無算名馳塞北子七人次景岱爲諸生餘皆成立嘉慶元年  
舉孝廉方正

郭桂字天香諸生性嚴介有才名通曉醫卜尤精大六壬每有占斷無不應驗醫術以眼科著其以單方活人亦甚夥年四十九而卒論者惜之

車載文郡庠生性孤介有才精堪輿兼善丹青嘉慶己巳以繪事見知於黃提學卒年六十形家之名益著

張雲翼陽高舉人父組以歲貢有醫名雲翼克精父業名溢三雲病危而賴其全活者甚多長子聰次明姪智皆以名醫稱可謂三世儒醫矣孫象樞遂占籍大同補縣學弟子員



